

奎堂木集

90783

1-4

道光己酉仲秋

孫

男

成

沅

謹

重

刊

古之文章其能傳之不朽者類皆遭際盛世君明臣良
得以雍容揄揚論述功德發明惇大之業推闡神聖之
心垂諸千秋與詩書相表裏夫是故西京之體爲可貴
也沿及後世文日卑弱好奇之士往往么韻孤絃別求
傳世行遠之作而轉視古人沈博絕麗者爲靡曼不足
爲一旦朝廷有大著作至于使命急宣乃局縮無可應
惟刺取依樣葫蘆之語以爲常格如是此廬陵謂翰林
無文章蓋不自今日始矣耳山先生由部郎改官詞館
以文學受

特達之知疊荷

聖恩晉階卿貳凡有經進之作莫不

嘉獎備至賚予駢蕃論者竊謂爲人臣子遭際如此豈非異數而不知其所以契合

上心者無他惟立言之得體也昔明宋景濂參侍講幄凡詔誥賦頌多經其撰述嘗賜宴禁中天子至親賦醉學士歌以寵之今先生在翰林時自奉

旨纂緝各書外其制草及一切典禮諸章奏皆出其手而歲首

重華宮小宴

召入聯句

賜如意畫軸以爲常是先生之著作與景濂同卽先生之榮遇亦無不與景濂同然則景濂開有明一代文章之運者先生又何不可爲

本朝之冠冕哉先生少穎悟讀書一過不忘撰文亦不假思索大率蘊蓄于中而騰躍于外故其氣宏深而博大其辭藻耀而高翔卽其使館往來賓筵酬贈隨作隨棄而吉光片羽流落人間亦自有冲和粹美氣象余讀

寶奎堂文集竊歎先生已往而光景常新然後知文章自有道也余在京師辱先生下交與之言恆訥然不出于口及其縱論古今水利兵刑食貨諸大事數其利弊又如掌上螺紋始知其經濟之大非可獨于文字求之然卽以文字論固已自有不朽在若余者叨隨詞苑幾三十年其間凡四掌應奉文字而拘牽常格無所短長每憶先生酒坐之談真覺立咫尺焉而汗浹襟也

嘉慶甲子秋八月錢唐後學吳錫麒拜撰

耳山先生以著作才受知

高廟殊恩異數冠絕一時中年益有志經世之學乾隆五十七年以副憲董校奉天遽卒于役未克大竟其用世爭惜焉 外大父王蘭泉先生爲作墓碑詳述生平并敘交契甚厚以時考之 先大父愛亭公同在詞館當亦有交誼余生也晚未獲知其梗概 先生文詩若干首自奏牘以及酬答莫不備具其體裁足爲圭臬而忠愛惓惓尤令讀者想見其爲人至襄定四庫全書及奉

勅編輯者度于

中秘昭示來茲尤足以垂不朽嘉慶十五年喆嗣慶循
刊寶奎堂集篋村集藏于家旋以海疆不靖板燬于火
道光二十八年余建藩于豫哲孫成沅爲臬司李懼其
遺澤將湮就行篋所攜原集謀復刊刻遵先志也夫爲
人孫子者先人有美而弗彰不可謂之孝今司李刊先
人之集其欲紹先人之業以補所未竟厥志殆未可量
也司李勉乎哉今年冬以集見示且請序于余適余方
哀輯先大父愛亭公遺稿付梓因其有同志也遂綴

數語于簡端

道光二十九年仲冬朔

賜進士出身護理河南巡撫河南布政使司前翰林院
編修館晚生嚴良訓謹序

昔寶鼎告重熙之瑞司馬陳盛藻於漢京介珪昭邨治
之符令狐輯長編於唐室厥後子元在官史通用簞君
實視事書局自隨後人豔其遇天下誦其書藝府望尊
才流宗仰副憲耳山先生根情苗言華聲實義意密
理粹致遠氣高游河上溯

堯年章成畫日絕越載畱禹蹟賦奏凌雲於是薇省影
纓槐廳珥筆口吐瓊書名高於鸞掖手揮霄翰譽播於
雞林輕縑素練之章瓊尊玉杯之貴星舒雲布錦繁珠
零金壺乍瀉卽堊青泥琅簡新揮總疑素構與河間相

國金版親駁玉箱共領柳蚪蜚聲於北府裴誼競響於
南省以一躍十駕之才正五方八體之繆用一揮九制
之敏擷四部六錄之華凡若劉略班藝虞志荀錄彙其
叢殘新其哀朽蠹出者沙汰蟬斷者補苴考訂亡逸赤
軸紛羅研覈異同黃墨精謹鳩集維勤不遺玉屑龍章
丕煥大啟珠叢提要一書抗名百世息乎棘寺分司柏
臺建績猶念書藏宛委魚豕易譌何期記讀瑯嬛龍蛇
遇厄窮陰躔度瀋陽首塗積雪沍寒譽星揜曜騰帙所
畱鼎彝並肅倣覆轍於古今則撰列朝之史記棧車於

嶺海則考勝國之蹤爲發幽光則大節炳於緗素能稽
殊俗則異聞識自契丹溯黃龍丹鳳以還問官則詳九
級增蒼隼青蛇之飾通志則載八旗聞攷京師三輔兼
搜其迹藁脩居正五代亦補其篇張侯遜此窺原紀勝
更逾蔥嶺元相存其少作編年復系篁村領辯悟異縹
句雕章輝煥炳蔚恢廓閑雅金絲互引玉石均調所以
激清風於八閩傳鉅製於四譯聆震雷之迅發景濃雲
之鬱興朝野望風山川增色袁翻變色於邢穎李白低
首於宣城不徒泉頌雙龍谷記千蠋矣又能鏗然自卑

惛焉若恤捩歆毋失縛紉不移炳燭不忘於垂暮劬書
卓越於當時擁旄三葉履操不異夫儒生清第百年誦
芬有待夫孫子芷泉司理篤念詒謀重哀遺集公續渡
江之後代顯國華士衡入洛之年先陳世澤守之於烽
燧驚心之後棐之於簿書執掌之餘以視詩編摩詰敬
念詰兄集著歐陽成由令子以今視昔尤有難焉長贊
後進叨陪前塵夙企瞻星氣而輝流翰苑願表忠宣奏
議之遺采風詩而近接麀孫兼志河雒同官之雅

道光二十有九年歲在屠維作噩陽月大興後學俞長

贊拜序

國家當重熙累洽治化光昭其時必有駿偉非常之彥
應景運以發揚盛烈班揚歌頌燕許文章所由與詩書
相表裏而光燄所在亦斷不與蠹簡殘編同其湮沒者
誠有以呵護之也道光丁未冬爾墉由京師來主彝山
講席始與司理陸君芷泉班荆道故旣而出耳山先
生寶奎堂遺集見示讀至半乃作而歎曰我
朝受

命有天下盛德大業遂古罕疇

高廟御宇六十年奮武揆文炳耀史冊復開四庫全書

館絜三古滙九流凡芝殿蘭臺及山岩屋壁之書無不
蒼萃六幕同文非有劉向曾鞏之材不足以光藝苑而
垂令典 先生與河間紀尙書同被

特簡值古今未有之遇讀古今未見之書所作全書提
要亦創古今未成之業猗歟盛哉爾墉生晚側聞父師
緒論私淑 先生于數十年以前真如太山北斗顧終
以未讀 先生全集爲憾今誦遺編庶稍快生平之向
往矣司理俯仰一官守茲集如天球圖壁出俸鐫板以
惠士林 先生文章與氣運相感通天下汲古敏脩之

士自有藏名山秘枕中以流傳之者固非一時兵燹所
能操廢興之權况又得賢子孫如司理者乎顧 先生
官通顯進御文字與友朋唱和流連山川所作必繁富
爾墉舊藏 先生題畫詩手蹟亦亟錄付刊雖所補僅
止一篇而先生默相之應異日必有繼爾墉以副司理
之心者固可券也

道光二十九年十月後學浙西周爾墉謹序

芷泉司理重刻其 先祖副憲公寶奎堂遺橐竟請敘
于芬芬也何敢敘 公之集然竊惟 公與 先曾祖
司寇公爲同年進士又與 先曾伯祖中丞公交集中
有投贈諸詩時 先曾伯祖方開府武昌 公有粵東
之行中道而返詩卽經武昌時所投贈者也未有話到
脊令原上草涕痕重爲小中丞之句蓋 先高祖恭定
公暨 先曾伯祖 先曾祖相繼官巡撫世故以大小
二中丞別之小中丞謂 先曾祖也是時 先曾祖已
捐館舍矣烏乎 公之詩可謂纏絲悱惻哀惋切摯凡

寶奎堂遺集
在讀之者無不知 公性情之篤吾兩家交誼之厚况
在所施者之子孫有不油然而生感情焉雪涕者乎如是
則芬卽不文安可不敘 公之集矧重之以司理同官
之雅殷勤之請于是銳欲屬橐而倥偬鮮暇也適奉
恩命擢藩畿輔不日將與司理別矣遂書簡末而歸之
有以見吾兩家先世交契之淵源吾兩人離合之蹤跡
俾後之子孫有所考而勿忘焉若夫 公之通材碩學
鴻篇鉅製固已麗篆縹緗黼黻宇宙世之讀公集者皆
能言之無俟芬贅一言以爲輕重也烏乎若司理之不

忘先澤亟亟焉抱遺集以刊之可謂孝思不匱永錫爾
類芬視之有愧矣承先啟後之規不於此見之哉道光
二十九年九月海豐後學吳式芬謹序

誥授通奉大夫都察院左副都御史陸公墓誌銘

青浦王昶撰

洪惟我

國家重熙累洽百數十載蘭臺石室所儲光燭雲漢而
皇上稽古典學復開四庫全書之館用惠執林先取翰
林院所弄永樂大典錄其未經見者又求遺書於天下
書至今仿劉向曾鞏之例作提要載於卷首而特
命陸公錫熊偕紀君昉任之公考字畫之譌者卷帙之
脫落者篇第之倒置與他本之互異是否不謬於聖人

及鼂公武陳振孫諸人議論之不同總撰人之生平撮
全書之大概凡十年書成論者謂公之功爲最多公諱
錫熊字健男一字耳山乾隆二十四年己卯舉於鄉二
十六年辛巳成進士二十七年春恭遇南巡獻賦
行在

召試入一等

賜內閣中書舍人旋充方略館纂修官時方奉

勅修通鑑綱目輯覽編撰以進當

上意遂進直軍機處三十三年十二月遷宗人府主事

繼擢刑部員外郎進郎中三十八年八月以撰提要稱
旨改授翰林院侍讀四十年二月授右春坊右庶子未
幾擢侍讀學士閏十月充

日講起居注官又充文淵閣直閣事四十二年春

孝聖憲皇后賓天凡大祭殷奠上

尊謚典禮嚴重應奉文字大學士于文襄公屬公撰進
皆被

俞允四十五年六月授光祿寺卿四十七年五月授大
理寺卿五十一年十二月提督福建學政五十二年二

月授都察院左副都御史仍留學政任以五十五年春
任畢旋京先是四庫全書之成也公任編輯不任校勘
而

上命分寫七分自

大內文淵閣外

圓明園之文源閣熱河

避暑山莊之文津閣

盛京之文溯閣各度一部又於揚州大觀堂鎮江金山
杭州西湖皆建閣以度之而前校勘者不謹舛錯脫漏

所在多有文溯閣書尤甚公以是書曠代盛典不可任
其疵類乃請自往校之既而以爲未盡五十七年正月
復往會春寒山海關道中冰雪凍沍比至奉天病卒預
是書之役者衆矣公獨勤其事而歿可悲也公以文章
學業受

特達之知故自四庫全書及通鑑綱目輯覽之外凡契
丹國志勝朝殉節諸臣錄唐桂二王本末河源紀略歷
代職官表攷奉

勅編輯見付

武英殿刊刻者又二百餘卷每書成或
降旨褒美或交部議敘或

賜文綺筆硯之屬奏進表文多出公手
上閱而益善之故事歲初

重華宮小宴聯句惟

南書房翰林得與焉三十九年奉

旨召入并

賜如意畫軸後以爲常蓋異數也其餘
特賞

年賞

節賞書畫石刻等物不可勝紀奉使衡文累歲不絕充
山西浙江鄉試副考官者各一充廣東鄉試正考官者
一充會試同考官者二提督福建學政者一去取精審
所得多知名士士論益翕然歸之公冲和純粹其色溫
然其言呐然而穎悟明敏讀書一過無不洞悉貫串少
時以詞賦入中書中年在詞館賓朋酬贈使節登臨四
方仰重其名率以絹素來請所作繁富闐溢篋笥顧不
甚珍惜輒爲人取去自以上蒙

恩遇逾於常格不屑以詞臣自畫晚年益覃心經濟之學常取杜氏通典馬氏通考合以

本朝會典如食貨農田鹽漕兵刑諸大政溯其因革審其利弊口講手畫侃侃然可以見諸施行而惜其年之不永是以訃至京師賢士大夫莫不爲之曾歎累息者公生於雍正十二年甲寅十二月初二日卒於乾隆五十七年二月二十五日年五十有九世爲江蘇上海縣人諱鳴球者曾祖考也諱瀛齡以選拔貢生官安徽石埭縣教諭者祖也諱秉笏乾隆辛酉科舉人者考也三

代咸以公貴

封贈如其官配朱氏封夫人先公卒以恭順能佐內政爲親黨所推子五慶循慶堯慶庚慶勳慶均皆孝友克家女五人孫男四人惟松江陸氏世以文章著見公七世從祖文裕公深在明宏治嘉靖間以通人名德望重臺閣流傳翰墨迄今人寶貴之公官職略與文裕公等若其掌著作而被

恩遇有文裕所未逮者且四庫全書定於

乙覽尊於冊府分布於海寓騰今邁古千載未有而皆

公審定而攷正之世之讀提要者見其學術之該博議
論之純粹顯顯然如在目前所著寶奎堂文集篁村詩
集雖不盡傳其學可無憾焉已余與公居同郡先後同
官內閣同直軍機處文酒之會靡不同者輯覽之修余
先任其事尋以從獵木蘭而公繼之余嘗至上海過公
竹素堂方池老屋不蔽風雨清修舊德久而彌著然則
知公之深無逾於予者茲慶循等卜以嘉慶五年十二
月庚午葬於先塋昭兆奉狀請銘其何忍辭銘曰
魚圻之裔世以文名繫公繼之蔚其魁閎綜裁簡冊以

黻隆平入典書局出主文衡拔諸髦俊用爲國楨七略
七錄鉅編旣成正厥謬譌往來

神京風饕雪虐卒瘁于征吳淞遼水共此環瀛雲車風
馬其返邱塋文昌華蓋作作庚庚昭于幽窆後昆之亨

寶奎堂文集原校姓氏

朱朝坤翁菴

黃廷符蓉村

黃廷珍岱雲

黃銘書詠樓

黃巖謙受齋

黃鼎慎菴

趙本東坨

喬淦葆堂

吳敬樞星宰

瞿應紹子野

李丙耀蘇菴

李鍾元硯香

唐國雍吟峯

重刊寶奎堂遺藁全集續校姓氏

章 浩我泉

曹宗瀚嵐樵

朱世琪季廉

張紹英旭棠

程晉佑康侯

沈世功礪山

張孔傳述夫

方 森子維

祭河神文

封土爾扈特舍楞郡王册文

工部侍郎內大臣三和碑文

和碩誠親王碑文

孝聖憲皇后諡册文

卷一

制草

經

進文

寶奎堂集目錄

上海陸錫熊耳山撰

孝聖憲皇后諡册文

和碩誠親王碑文

工部侍郎內大臣三和碑文

封土爾扈特舍楞郡王册文

封土爾扈特沙喇扣肯貝子誥命文

祭河神文

聖駕恭奉

皇太后南巡頌 謹序

聖駕四詣

盛京恭謁

祖陵禮成恭進樂府 謹序

卷二 經 進文 御試文

恭慶

皇上七旬萬壽樂府 擬上 壽曲九章 謹序

聖駕五巡江浙恭紀 擬康衢問答辭

誠無為論

擬爵李躬桓榮詔

擬循古節儉奏

耗羨有無利弊策

卷三 表 劄子

為王大臣賀

平定緬甸表

為王大臣賀

平定金川表

爲總裁進

平定準噶爾方略表

爲總裁進

御批通鑑輯覽表

爲在京漢官奏謝開科蠲漕劄子

爲熱河諸生謝設學建廟釋奠落成劄子

爲王大臣謝

賜清文鑑劄子

爲王大臣謝

賜御製詩三集劄子

卷四 劄子

爲王大臣謝

賜日下舊聞考劄子

爲王大臣謝

賜蘭亭八柱帖劄子

爲王大臣謝

賜重刻淳化閣帖劄子

爲總裁進

爲總裁進

平定準噶爾方略表

爲總裁進

御批通鑑輯覽表

爲在京漢官奏謝開科蠲漕劄子

爲熱河諸生謝設學建廟釋奠落成劄子

爲王大臣謝

賜清文鑑劄子

爲王大臣謝

賜御製詩三集劄子

卷四 劄子

爲王大臣謝

賜日下舊聞考劄子

爲王大臣謝

賜蘭亭八柱帖劄子

爲王大臣謝

賜重刻淳化閣帖劄子

爲總裁進

評鑑闡要劄子

爲總裁進舊五代史劄子

恭進乾隆三十九年

起居注劄子

爲軍機大臣議改定

郊廟行禮儀注劄子

爲總裁擬

進銷毀違礙書劄子

謝授翰林院侍讀

恩劄子

謝授右春坊右庶子

恩劄子

謝授侍讀學士

恩劄子

謝授日講起居注官

恩劄子

恩劄子
謝補光祿寺卿

恩劄子

謝授都察院右副都御史

恩劄子

謝

賜千叟宴詩劄子

卷五

策問

乾隆三十年山西鄉試策問三首

乾隆三十三年浙江鄉試策問四首

乾隆三十五年廣東鄉試策問三首

卷六

示

賦

論

曉諭諸生示

申諭釐剔弊源以重關防以端習尚示

考試古學示

飭禁書寫俗文別字以正小學示

召試觀回人繩伎賦

螭螟賦

觀穫圖賦爲陳碯菴作

二陸論

裴行儉知人論

漢景帝論 石埭少作

唐太宗論 石埭少作

唐武后論 石埭少作

卷七序

山西鄉試錄後序

浙江鄉試錄後序

廣東鄉試錄序

全閩試牘崇雅編序

朗齋吟稿序

蒔花居詩存序

竹濤集序

傷寒論正宗序

補陳壽禮志自序 石埭少作

石埭縣志糾繆自序 石埭少作

卷八 跋 記 啟 書 贊 箴 頌 擬制

李柳溪自記跋

周禮讀本跋 石埭少作

佛龕記為江畹香作

三元喜讌徵詩啟

擬劉勰以文心雕龍取定沈約書

石埭少作

六世從祖小山先生遺像贊

擬屏箴

有序
石埭少作

宮保大學士嘉勇福公平臺述績頌

并序

戲擬封橫行介士郭索為醉鄉侯制

卷九

壽序

祭文

傳

墓誌銘

錢嶼沙師七十壽序

王母吳太夫人八十壽序

孫封翁李太夫人雙壽序

沈太守砥亭六十壽序

李果亭六十壽序

浙江提督喬東齋祭文

張太夫人祭文

湯亮孫傳

石埭少作

喬松老人傳

陶然黃君家傳

喬母張夫人家傳

榮祿大夫都察院左都御史朱公墓誌銘

通議大夫妙正真人龍虎山上清宮四品提點婁

公墓誌銘

節孝汪母王孺人墓誌銘

文林郎婺源縣儒學教諭王公墓誌銘

中憲大夫工部營繕司員外郎朱公墓誌銘

贈奉直大夫太學生古存黃公墓誌銘

贈淑人亡室朱淑人墓誌銘

卷十

炳燭偶鈔二十九條

卷十一

代作

平定兩金川大功告成頌

并序

代袁清恪公作

恭慶

皇上七旬萬壽詩

并序

代阿文成公作

聖駕五巡江浙序

代阿文成公作

御製全韻詩跋

代于文襄公作

乾隆三十六年會試策問一首

代劉文正公作

乾隆三十七年會試策問五首

代劉文定公作

卷十二 代作

光祿大夫贈太保武英殿大學士文襄舒公墓誌

銘 代于文襄公作

光祿大夫贈太子太傅文淵閣大學士文定劉公

墓誌銘 代于文襄公作

光祿大夫贈太子太保戶部尚書文莊王公墓誌

銘 代于文襄公作

榮祿大夫吏部右侍郎加尚書銜恭定吳公墓誌

銘 代于文襄公作

重建慈度菴碑記 代常州太守金蔣亭作

寶奎堂集卷一

上海陸錫熊耳山撰



制草

敕撰 奉

孝聖憲皇后諡册文

崇儀告備薦玉策以伸虔

懿行垂光勒瑯函而闡實報劬勞之

厚德禮洽馨聞嚴對越之

鴻名義隆睿作欽惟

皇妣大行皇太后

順體天經

化彰人極

萱庭示範仰宮中之有

聖人瑤甸歸仁臨天下而爲

大母自流徽於京室荷篤慶於藐躬億兆騰歡萃萬方
爲尊養曾元衍瑞裕

五世以融怡緬

義訓之常昭洵颺言之莫罄貫

鳳綸而賜復澤及葭蓬扶

翟輅以觀民呼兼嵩岱益圖旅賀來庭之鵜鰈駢臻偃
伯承

禧絕徼之干戈竝戢是皆

慈暉普照覃嶽澥而含和用能

純履康綏儷乾坤而集福憶昨者金泥絢祝十八字疊
演箕疇冀來茲寶王鐫華億萬齡重增姬算惟愛景情
殷

顧復依旬之臚頌何窮宜

慈躬祉懋升恆晉册之揚麻未艾何

寶奎堂集
升遐之忽邁竟攀慟之難追率土纏悲終天銜恤肇
尊稱於殷禮念形容無得而名稽上諡於周書極擬議
於斯爲盛有孝實原有德本百行於地天乃聖卽協乃
神媿獨隆於堯舜一詞莫贊敢憑素悃以追慕萬世爲
公竝詢僉言而咸翕爰遵彝典請命於

天謹奉冊寶上尊諡曰

孝聖慈宣康惠敦和敬天光聖憲皇后於戲溯

璇闈徽音大行宜特隆冠古之聲頌清廟昌後燕天庶
稍展崇親之悃伏冀

神靈式妥

陟降在茲文琬貽型抒慕誠之罔極彤毫述德荷申錫
於無疆宏啟嘉符茂昌景祚謹言

和碩誠親王碑文

朕唯天潢襲慶本支之澤方隆藩度貽庥大雅之風可
溯疇若宗盟之長敘愍冊以非私每懷尊屬之賢勒貞
珉而有耀惟王端凝叶矩醇謹流禔慧著垂髻

聖祖洽承歡之愛榮膺疏爵

先皇推同氣之恩憶會展帙同堂進學常資夫講習越

寶奎堂集
三
白剖符就邸睦倫更切乎倚毗典屬籍於宗司望崇瑤
牒寄分猷於統制政肅牙麾班朝則首率常聯殿上列
維城之冠巡守而綜襄庶事禁中資留務之勤正茂景
之承禧祥歌行葦何涼颺之戒節疾問長桑惟時迴蹕
初聞頻咨攝衛宣醫遄遣期導康綏尙看扶掖來朝想
剪裊之如昨詎意倉皇臨視愴和藥之空勞爰親奠醑
以申哀仍舉彝章而錫綈給精鏐於內府薦雕俎於長
筵節惠攸宜易名曰恪於戲唐叔之封圭宛在誼篤褒
親河間之塋樹方新情深感逝念昔日詩書起譽嘉儀

表於皇枝信他時金石揚徽荷絲綸於國典式昭令問
永視豐碑

工部侍郎內大臣三和碑文

朕惟職隆邦事程工嘉式敘之宜榮荷朝章篤蓋勵維
寅之節領班聯於近陛華髮承恩瞻風采於垂紳丹忱
效績旣著圭璋之令望宜留琬玉之芳聲爾原任內大
臣工部侍郎三和端謹持躬懋誠宣力光依執戟早充
宿衛於期門榮溢影纓游綜勾稽於內省相是材能之
懋允惟任使之良擢農部而分猷泉刀克裕佐冬官而

董治水土咸平進參正席之班率屬而仍司飭庀再踐
貳卿之列鐫階而倍凜冰淵履近星辰極品之崇銜復
晉鞭垂禁籟稀齡之優禮加隆當厯考以彌多宜介禧
而愈茂工虞居六職之一將永藉夫劬勩康寧爲五福
之三胡遽嬰夫疾疢閔勞職事願安許就私家軫慮沈
綿療治敕頒珍藥遺章竟告愍綍遄宣陳彫俎以薦馨
發帑金以歸賙節其壹惠諡以恪勤於戲卅年膺將作
之司守度克彰於溫樹奕世賁飾終之典崇褒式煥於
堂封表厥幽阡昭茲來許

封土爾扈特舍楞郡王冊文

寰宇同風殊域凜尊親之戴雲霄布澤天家昭典物之
隆唯革舊俗以抒忱會其有極斯考彝章而命德奉以
無私爾舍楞裔本漠陞心依魏闕屬窮荒之暫息遷地
居難遂合部之偕徠瞻天路近從狩習周法之制班朝
霑醴讌之光懷我好音爾克自求夫多福復其邦族朕
唯一視以同仁擇水草而攻駒俾享昇平之樂配方旗
而建隼永圖生聚之安特建崇班式彰異數茲以冊印
封爾爲札薩克多羅弼里克圖郡王於戲嘉順節以推

恩庸以示綏懷之禮備藩封而守度尙無忘恭敬之心
茂對寵光往膺祿位欽哉

封土爾扈特沙喇扣肯貝子誥命文

率土同歸丕著懷柔之略法天廣覆普垂臨照之光臚
衆志以懷音來王恐後布大公而頒賞與國咸休爾沙
喇扣肯志切輸忱情殷慕化朔漠庭之自出少克承家
會朔部之靡寧居思樂宇爰啟關而請覲迺逐隊以偕
朝行幄升班慰瞻雲於晝接仙莊涖宴敷湛露於春溫
體予睠待之優式洽寵綏之典茲封爾爲札薩克悟察

喇爾圖固山貝子錫之誥命於戲訖教協拱辰之義宜
無替於承恩疏封開奕葉之祥庶有辭於永世是用釐
爾尙時欽哉

祭河神文

惟

神化洽資生功昭濟物溯靈源於九曲懷柔推四瀆之
宗導遠派於三門利賴徧中州之壤自昨金隄忽潰憐
下隰之成災因而菱蕪頻塞遣重臣以董役屢頒庫鏹
徵材兼及於青徐特發倉儲拯溺倍先於儀考乃鋪雲

之競集績難就夫三冬顧簸浪之仍愆功復虧乎一簣
籌委輸於引溜移上游而冀底安瀾軫疾苦於窮簷逾
半載而弗蒙

垂祐撫朕躬而自責慚肝宵之誠意未孚倘

神聽而可回念黎庶之顛連何罪爰舉崇河之典不禁
迫切以陳辭虔申沈璧之儀唯有屏營而祈助尙邀
靈貺速藏鉅工

經

進文

聖駕恭奉

皇太后南巡頌 謹序

我

國家受億萬年無疆之祐佑啟

皇帝以神聖文武纘承

列祖麻緒誕保萬民照臨四海遠無弗屆大莫能名
御極以來典學勤政動得理所

孝德昭融

神威遐暢天聲

寶奎堂集
廟勝犁庭掃闔自累代不賓之地咸入版圖供職貢光
天之下日出之隅孺乳煦嫗以長以息游於大當厥有
歲年而

皇帝以如天覆幬之心猶念四海元元若一家子維安
平太罔不豐雍將俾永永年鑠乎大仁之化不可以不
省迺

疇咨故事行巡狩之禮東距岱宗南涉嵩洛西抵趙代
北越塞外所至問疾苦禮高年陳詩納賈同律度量衡
塞晏駿龐萬世一遇而江淞地斥以廣實庶且繁自我

聖祖仁皇帝六駕時巡惠滂施厚誕彌鋪衍於今數十
年所百姓浸膏澤震聲景得以鞠子養孫休息於太平
者久而未能匍匐道左一望

穆穆之光則維思慕之忱是冀是祝

皇帝顧瞻南土睠維

先烈之孔昭俯念輿情之誠且摯於是以前乾隆十六年
辛未暨二十二年丁丑再術

巡典耆耆孩養熙熙愉愉無不仰望

屬車厥角稽首自始戾止以洎

大駕之還餐挹茂德如雨汎濩滋液滲漉不可殫紀民
之被

澤也益以厚其望再

幸也益以切喁喁味味回面內響於是岳牧之章達民
之虔以二十有六年請

皇帝曰慎哉惟歲之或不登予不愛廩粟飽之而又以
除道奔走我有司予其有俟越明年歲仍大有室家樂
康其望

幸也益堅且至大吏則申以請

皇帝曰敬哉惟茲

慈慶七旬導和引禧頌聲多豫其戴

皇太后德者甚厚予將奉

安輿臨焉俾我民世世壽昌以洽我

慈歡以紹我

皇祖無窮之庥烈其如所請於是申戒有司崇儉黜華
一如前

詔二十七年春正月

車駕奉

皇太后南巡勞農省俗加惠無已勸資錫予益便以蕃
扶老挈穉喜得重覩

天顏緣道抃舞踴躍歌嘯聲徹遠邇臣伏稽唐虞四巡
方岳周之墮山喬嶽爛然詩書播在歌詠後世間踵前
典而或侈封禪縱遊觀奢汰不經不足昭示無極

皇帝惟堯惟天作民父母念罔不在億兆人是故十二
年間三與江浙百姓相見慰勞婦子飲釀被懿而民咸
沐乎

高厚之德周覽富庶臚懽愛日而民咸諭乎

光前之孝察吏循軌延登三老蒸進髦士披章乙夜儲
思垂務而民咸廸乎

勅幾之哲

乘輿三幸丕揚

前列登躋極軌靡不宣臻乃至跋行喙息蠓飛蠕動之
類畢用又若而民咸諒乎

聖祖

聖孫攬手接武爲生民未有之盛唐哉皇哉茂則上儀
鳥奕顯鑠負絕萬古照耀巍巍臣愚生長

盛世霑被雨露之澤者至深至渥又得從諸父老後恭
迂

鑾輿親遭逢於百千萬年非常甚盛之典輒抃躍不自
休謹撰頌十章章十六句以

獻其辭曰

皇帝建極闡繹基命緝熙有光作天然聖大揚

惠言徧照萬姓莖韶協度玉衡齊政宵升

泰壇下管上磬大裘曷若昭格神聽

寢門視膳起孝起敬瑤函寶冊用洽大慶

北面師儒攝衣升堂於樂辟靡鼓鐘喤喤禮樂具舉於
周有光四征不庭撻伐大荒屠耆郅支斧膏其吭流沙
不毛盡我版章獻其楛矢肅慎來王冠帶侍祠赤狄青
羌

升中泰山秩望燔柴百神受職靈壽晝開峻極於天嵩
高崔巍代郡雁門臬臬五臺陪京鬱蔥漆沮有郃式是
四國侯時邁哉招搖前指和鈴喈喈守土臣某奔走偕
來

帝眷南顧於江之澣包淮絡海維揚州土赫赫明明自

我

烈祖乘輿六駕秋助春補不愆不忘傳次在予予不憚
勞往錫之祐

玉趾再勤慶典備舉輝山潤川巷有歌舞

鸞旂大輅還歸於

京羣黎慕思如彼孺嬰飛章閭闔達螻蟻誠天門四開
聽聰視明維歲之故式徐其行母女煩勞以飽女秭其
棘其紆胥視蒼生地載天壽蕩蕩難名

帝有恩言迺育迺遂不遑啟居哀時之對駕龍十二沃

若六轡期門四羅肅肅萬騎太常婀娜翠葆羽蓋填衢
父老爭謁掌次虞后五載周十二歲前聖後聖合若符
契

導自積石黃河走東櫬檣親乘疇若予工宣房瓠子春
流溶溶鬢之醜之運於

重瞳方舟濟江波伏無風馮夸前驅魚長龜穹萬靈奔
走駕梁成虹

天子至止來君來宗

宸章琳瑯照爍巖藪龍蟠鳳逸字大於斗魚鳥咸若卉

木孔有

翠華來思夾道楊柳宛宛婦子壺漿在手福祿之茂

慈聖之壽

皇帝大孝衆拜稽首如岡如陵同天地久

厥土塗泥下下維均我載青旗來惠農人昔頻復稅庾
積其陳今履青疇晦茁其新勿賦芻蕘飭我虎賁勿撤
茅茨戒我臣鄰衆拜稽首

皇帝大仁於萬斯年爲天下君

無偏無黨王道正直匪敖匪游求莫孔亟庶民後來含

和飲德

皇于三狩永惠南國豈惟南國萬邦歸極甄殷陶周光

我典冊小臣執簡管窺蠡測作爲歌詩垂萬世則

聖駕四詣

盛京恭謁

祖陵禮成恭進樂府謹序

臣聞樂府之作所以述宣功德體視賦頌尤鏗錡炳耀
足以震盪耳目漢代有重來上陵二曲爲上陵食舉樂
府重來辭不傳上陵則惟侈言神怪不稱臚聲纂實之

義臣竊陋焉伏見我

皇上睿聖嗣服

道隆守初丕冒無外永維

祖

宗肇邦受

命佑啟我家祇祓對越三率彝典東謁

闕寢蒸蒸之思夙夜滋虔迺以今歲仲秋時巡

京瀋展事

三陵

慕忱齊恪肸鬯昭融還

莅舊都章式勇備

達孝所暨萬禋畢從跨周轅虞無所與讓至於和神誠
民綏遐勤紀經文緯武所以崇天聲垂軌物有加於昔
者尙數十事舄奕版策不可殫記

回蹕禮成卿士庶尹百執事胥效賡頌臣愚誠不足揚

挖萬一而恭逢

嘉會翼翼之私不敢以輕薄自解輒指事件繫仿古樂
府譜調別題篇目編爲十二章詞淺義直庶令籥工轅

童皆得諷吟有以發揚

聖天子盛德庥光傳示無極臣誠懽誠忭拜手稽首謹

上

聖節受釐

山莊發軔良辰協吉順天行也爲壽星明第一

壽星明煥煥黃紛嘉況臨

瑤闈東鵝西鰈咸會稽首上

皇帝千萬歲熙沆漭詹秋期結霽雲碎華芝前驅八神

大丙奉駢

惠迪吉天門開招搖指東之畿肅肅四面歡俟來

蹕路經藩部莅邊門所過鞠脰奉觴歡心允洽也爲柳

邊青第二

柳邊青青以紆亭亭窳堵坡路轉興中墟和龍左令支

右別部保塞各各安鄠闔昔甌脫今禾黍

翠葆容與鞞紱俠塗齊負弩采椽不斷構

行宇擁篲清塵職守土積蘇衣都曇鼓筵開詐馬旌門

拜舞

陛下萬年中外主

三陵謁祭備物升馨光

孝思循彝典也爲高山作第三

高山作基庥祥

天祚德九州享淵穆穆

聖重光迪

孝熙寅蒸嘗予有慕眷舊邦鞏

穀林龍蜚鳩辰長白襟三江

帝來覲芬蕭薌越闔茂溯尚章歲不居懷秋霜四展祀

昭

皇誠

容有睟優若望榆之樹飭幄張石馬馳嘶靈風陳廣牡

臨齋房舞八溢鏗琯鳴

神在天感洋洋承放悲歆嘉觴祐

孝孫慶無疆

五朝冊寶奉藏

盛京

太廟對敷

鴻庥昭無極也爲章

神烈第四

章我

神烈於昭于天揚徽熙號玉檢瑤編練吉日格

新廟千祗翊從鸞旂前導芝栴霞棋盤龍琅函瑀几當

中赤文綠字光熊熊奕世侑

德饗

功日月照耀垂無窮

御盛京

崇政殿受朝遂

錫愷宴大和會也爲

聖當陽第五

聖人當陽

崇政朝百辟仗衛從從馬印劔烏

堯階采茨重阿閣德羽集十亭岩帶法會陳函宮吐角

蘇八音沛父老南陽親在鎬愷樂宣

皇仁

朝鮮國王遣使起居

賜詩嘉寵文軌大同也爲平壤朝第六

平壤萊幣朝

天謁者引鄉交閭前使者嗷嗷致辭臣 祚拜表
丹墀

帝嘉守禮

庸作歌樽柔東被

光華多慶尙全羅鯨波漉蕩沾

朝恩咨爾世世奉職修東藩

盛京鼎建

文溯閣分庋四庫全書義符過澗經籍道光也爲水之

瀾第七

水之瀾導崑崙

聖之文繹義軒圖書甲乙丙丁

淵

源

津薈枕三層淮南浙之西波漑襄帽榮幽居臚編

祕閣妥三萬六千星摘穎長恩守樞以環列太乙吹藜
而來下文館崇儒遡册府

文皇文思

帝稽古東壁揚輝慶繩

武

敕繕治奉天屬城葺工

臨視壯觀瞻固封守也爲屹金郭第八

萬雉屹金郭煌煌衛京雒賦文給水衡鳴磬喜偕作鐵
爲壁湯爲池丹雘粉堞蕩蕩開通堦

帝臨省厥成重履視咨周行思難圖易民咸寧不見永

安極長虹倚疊道

祖澤千春儷穹顛

王迹肇基興懷

祖烈川原諮攬卽事

摘吟

命皇子彙錄函藏闡

光猷式

明訓也爲漢昭回第九

漢昭回

天爲章震耀金石諧宮商經過懷

聖蹟松杏山河長壁壘屯風雲旌旗尙飛揚思

王業

王業多艱難

詩以言志造化迴斡歸毫端

守成慎永圖蒙

麻景貽安三復豳風篇欽哉永寶以弗諼

咸秩山川崇建祠宇上下

神祇感受職也爲萬靈趨第十

拱

玉鑾萬靈趨視公侯般徐徐句驪東梁相灌輸納嚕皓

旰流英峩鼎祠壇

神之愉周流常羊橫泰河遼東復遼西突兀醫無閭絡

以大瀛海升香網豫通虛無和風甘雨溟不波

登高樓臨碣石萬里青銅點颿黑

行慶推恩

澤覃豐鎬宏錫類也爲湛露滋第十一

湛露滋萬物各遂生復租稅吏不呼門九年儲無待三

年耕旗莊差次貸減困粟滿盈校官歌鹿鳴弟子增員

遊膠庠咸禮讓無所爭雞竿子子視罪輕重弛其刑存

問高年束帛異綦守吏

賜爵一級暨從官下有司書姓名

聖德普福如天葆樸含淳同樂太平

鑾迴歲成格

廟班朝鉅典喬皇

天庥滋至也爲慶

蕃釐第十二

蕃釐來成慶馮馮

昌瑞祇薦百福同

帝車迴杓臨紫宮秉鬯

太室孚

天衷微垣端正開明堂華鐘鏘洋宣八風卿烟八呂曦

曠曠皇哉

孝治格

祖

宗延洪

純算曼華嵩光被四海登熙豳

孫男成沅謹重刊

寶奎堂集卷二

上海陸錫熊耳山撰

經

進文

恭慶

皇上七旬萬壽樂府

擬上壽曲九章

謹序

歲上章加子壯月旬有三日恭逢

皇上七旬萬壽聖節純嘏懋臻嘉禧駢香合撰乾始增

紀無量

昌期告禎曩牘遐睹

皇帝乃以元辰誕敷

德音博惠陬滋庸答後懇而

盛德冲邃不居旅賀自爵土采迺秀民兆姓以逮藩國

之長黃衣冠之師益樹領翹趾展祝悃謳誦謹物億

口一音

臣蒙

恩典校祕書近

光覃渥忻躍倍萬每惟

功德巍巍隄軼繩契雖酌蠡測管未由規晰於萬一竊

考郭茂倩樂府燕射歌辭晉宋四廂樂皆有王公上壽
歌曲而指意淺陋其詞弗稱輒依仿厥體本中外嵩呼
臚頌之志演爲上

壽曲九章庶叶諸管絃侑

萬年之觴有以宣導下情榮鏡顯符對敷無疆之庥慶
臣誠懼誠忭拜手稽首謹上

擬王公上

壽曲一章章四十句

章

聖符邁威神應

帝期沂昌源肇大邦作高山

武之揚燦豐功叶殲四路燁霆震輾松杏馘麋麇宅新

邑正三辰

烈丕承廓岐函蒙古服朝鮮臣式

典訓垂億年大一統咸率賓

聖繼

聖綏兆民頌鳳紀覲龍鱗訖晦昧融

皇仁鍾

五葉開風雲篤嘉祐生

聖人迪

前光媿負聞大報功昭睦親洽辨章化無垠獻

曼壽彌千春

擬文職諸臣上

壽曲一章章二十二句

皇帝踐阼董正百官邕熙念德治登泰安於穆衢室疇
咨日勤棘序槐庭咸荷

照臨

帝挈懿綱臬表儀陳吹之揚之有翹其倫踣之蹶之有
恫其昏

天鑒因材品式平均坦坦康逵祁祁德心王道正直人
思白殫

聖壽萬億紳纓洽歡

擬武職諸臣上

壽曲一章章三十一句

我

皇握樞愴稜威八荒參旗井鉞用征不庭普天率土莫

不來王執義討不憚

天聲震戎疆出車有衡旗有章

廟算協惟斷以有成助順

天降康撫附剝逆萬里不持糗糧月蝓旣平河源旣通

遼西山白狗羗敢跳跟刑有常

天戈一揮絜會如羊畚耕邏戍遙相望四衛遺支踔羅

剎而歸誠會爰閭伊綿覲

光磨高崖凌穹蒼與天竝永

萬年慶無疆

寶奎堂集
擬岳牧諸臣上

壽曲一章章十七句

聖化浹兮九區受

朝寄兮鞅曳而佩紆奉進止兮

皇之謨燭萬里兮戶樞述我職兮來趨凜

命討兮袞與鈇

皇之巡兮遵川塗効負弩兮前驅

御茨階兮臨青蒲仰

儉德兮垂模流竹箭兮波徐石鱗鱗兮海之隅迴

重瞳兮都俞鞏奕禩兮塵河渠願年年兮掃除迓
清蹕兮承懽娛

擬在籍諸臣上

壽曲一章章十八句

大君履庥慶中外被禔福佚老歸田廬

恩優視祠祿生逢太平年名亞耆英續皤皤偕庶老子

弟互勉勗銀牌綴彩縷黃繩耀華服肖翹各含生矧乃

荷

涵育山中芝作蓋海上籌添屋

天行仰彌健臣齒愧見錄願同擊壤民常効華封祝

擬士林上

壽曲一章章十九句

天垂奎壁文章府五緯聯躔珠貫組

聖人則之成化普芹領菁阿大昕鼓山川出雲天降雨
詆蕩亨衢鴻筮羽甲乙環開

恩榜五孝秀論升欣接武泰濛之西灤水滸新翼絃誦
皆鄒魯體祛軋茁崇雅古如周中規折中矩

彝訓崇閎式藝圃羣流滙瀛寰四部蕭艾咸芟採蘅杜

三閭牙籤扶棟宇故事麟臺那足數

壽考作人欽

聖主橫經挾槩紛歌舞

擬耆庶上

壽曲一章章十八句

桐生百物華滋十雨五風應期

醲膏周流四垂含哺鼓腹以嬉

湛恩次第溥施壤賦全蠲不訾漕艘限年罷齎

賜復屢浹淪肌窮檐貸穀行糜寒暑

勤思怨咨艱難

知小人依昔州髻皆艾耆長養幸際

昌時疏秧春隴一犁納稼秋倉萬坻爲此春酒介眉元
會運世遞推兕觥歲晉

蕃釐

擬藩服上

壽曲一章章十三句

象胥鞮譯六幕陶

皇風車書玉帛內面爭來同外臺茶幣王會陳旣宗亦

有丹青職貢新圖工周陟羽獵甫草歌車攻諸藩以時
人

覲陪瑀弓九菌百濮炎海波浮空昆侖西極王母之所
宮伊古書契紀載難形容陸讐水慄奔走罔不共
山莊會極絡繹隨賓鴻纏頭錄耳効祝齊呼嵩上
皇帝壽章部環無窮

擬班禪額爾德尼上

壽曲一章章十五句

揚法螺霏天花遠涉絕漠朝

皇家

佛出世臨正衙震旦壽寓開光華資十力演三車現大吉祥

帝所嘉寫須彌竝洛伽塞山萬道絢紫霞頌

皇釐侔岱華

平聲

積算永紀恒河沙

聖駕五巡江浙恭紀

擬康衢問答辭

皇帝四十有五載

蕃釐錫慶覃衍黃圖有

詔五巡江浙籲章是俞斗柄插寅

六飛首塗粵百有一旬有七日而

旋軫於神都鴻儀備

闔澤濡謏

臣

懜學珥管

金鋪聆桑梓之質諺採里巷之驩歛謹詮紀什一竊附訓方之所臚

有康衢謠童問於壤叟曰元化丕宅卜征簪期太乙天日躔臨四維懿哉爍乎

皇帝五巡之上儀也渙

寶檢於元朔而壽寓慶綏案瑞牒於俶令而春霽汁宜

且練日在卯木德迓釐蒼牙氏所以登敷教之臺行八
風而奠九陂故迺對

祈穀之燿燎戒避耕之驂駢德疇遐而弗浸膏罔罅而
不熙洵其爲踰遠古軼來茲者乎

壤叟曰戴灑英者銅渾不能範其大履游極者瓊柱不
能測其會印惟

恩霑化翔周浹於

前巡者久隱賑而無外

天子儲庥摠念勤勤懇懇亦既有年而

翠華重幸乎江介吾儕小人賦軫游漱樽瀼蓋宣臻演
溢滲肌而延脰者倍什伯於曩載今子亶晞雅頌典馥
之文而弗摺陬滋擗誦之概奚其爲儻擬也曷不叩槃
鑰竭菅蒯條次件舉更端而對

謠童曰牒牒揚土襟淮抱瀛桑雋應候農鷄報成獨不
睹

皇帝之載耒而省耕乎饁者負襁鉏者輟矜盆薌芬蓋
遮術跽迎紛傑儻不可以數計飲飛式道寅喻
上指曾弗懣夫趨聲自我天覆雨施雲行蓋

寶奎堂集
霓旌未拂乎首頓而

德音雷動早沸岷絡而殷稽陘逋滌其舊百萬是贏供
免其新什三是程其使持節所理三郡無出今年租賦
咸厥緊望差重輕它若留稔秭殖茨京禮覲鮪惠孺嬰
宙合咸餘千里一垌皞皞乎歌遂物者葛天之氓吾其
捉物而進賡

壤叟曰江左昌丰百貨輸備雄閣背望鉅賈鱗次車服
光靡千鄜百隧

天子侑然閔侈風之些窳而思博以瓦蕡還几蘧與赫

蘇訓允式夫

四莅塵

皇情之迴慮申董勸而彌摯凡我薦紳大夫士以暨游
蕘之僮灑削之隸罔不含真鏡粹邨成淳治庸上迪乎
聖人之志

惟
謠童曰伊古羣后會嶽敷奏庸功栝榘爰閩袞絨來同

上聖董正曰虔鞏有位內外罔不共雖萬里恒竦若進
對矧扈鉤陳以景從

皇帝乃御朝覲之帳而釐百工焉疇錫以乘馬疇旌以翠章叶疇報善最而進律疇換劇易而替衝甄除道之庶案轉一階以遞崇以至四方會時事者亦奉進止司馬門外述職守於

睿聰洵虞考無以藻其密而漢課不足儷其公

壤叟曰負弩入疆先驅岳牧謹汜掃夫行館以候

御宿彼不橐而自轅競子來於版築謝粉丹之絺纈蹠

山水之灑淑

皇帝猶澹無爲敦太璞式茅茨之不斲斥雕幾之近縟

爰牖以臺簡之要斂以清淨之福

詔書切誠儆於有位曾不憚再三以申告緬采椽與卑

宮實巍巍遠媿夫芳躅

謠童曰琅玕獻其采竹箭毓其材挈柄八坻頓絃九閔方狴

闕以鱗集試南宮而翕開聯奎耀以旁魄燭斗牛而昭回擊轅之吟協韻於紉縵迎

鑾之曲比節於扶徠迺

行廬之給札江浙則薇垣綰職江西亦桂苑題籍如遡

玉堂而登蓬萊陶類沼之樂豈廣青衿而煦培僉詠路
嘔喻紉菁阿而進曰盛哉

壤叟曰斟元鞫化煥乎

天文范雅甄謨仰乎

大君惟

神毫擣染漏未移點晷不昷分臯煙隰靄悉受

大造之迴幹山若增而嶇嶽水若波而齋淪蠕娟翹秀
之屬若益蓂龍而玃玃白

初二三集藝圃所牴沫舊均新藻珠聯璧疊咸迴出於

思聞墨海騰虬豐碑切雲展也媿八閩軼三墳長照耀
乎無垠

謠童曰

鑿輿時省誕錫多祐沃之若露灌之若乳噓之若風膏
之若雨被渤澥之餘潤猶液漉而不可僂數豁丁竈以
紓力尉牢盆之劬煮祝

湯仁之解網迴陽曦于園土組練搏隼艤鱗翼虎

華蓋容挹歡臚江滸黃頭守權日顧其旅樓船停輓月
餼其伍所過名山大川薦熳謳辜考鐘櫟敵

賈至文集 卷二
三
睽舊臣之宿草澤竝漏於雕俎

鴻施渥典隨徽志以匝匝夫奚一物之不獲其所雖翰
林子墨怵思拙毫亦莫殫其覩縷况耕鑿之順則宜鼙
鼓而軒舞

壤叟曰綜子之辨約子之指譬踐旄敦而度高酌沈濫
而量委物規晰於萬一尙未罄

勤民之懋懿也今將慶恬波於靈溟瞻榮光於德水告
子以

不績博子以要旨

謠童曰海於有蔽鹽官之塘重郭抗濤屹焉若鷄審起
伏於坻漲告南陔而北臧維

天臨眡成以定畫盍觀寧而挖詳

壤叟曰三疊噴欲互爲衝首伍胥之所汨重竇蒙之所
析剖崇隄螭輪萬弩壁守曩者

金根屢紆肇未迄酉

重瞳周覽什究燦夫八九相水土以搏掎知排椿沈撻
之各有所取故一層二層之坦四尺五尺之誌條石出
石之規竝握竿於貞久今

籌安重莅諏可度否齧帶郭之舊防

命易糞而培厚鹽倉東鶩竝海屈糾柴石間築

計鞏厥後地所受栽戒爾植擷別以緹鳥固以牝牡仍

資衛於宿薪毋以改建而遂忽於棄帚覘成腴以惠瀾

懣陽侯而卻走維浙西千億萬赤子永戢生成於我

后

謠童曰河宗自出昆侖之巔葱嶺蒲昌是惟重源乃千

里一曲一直而歸墟於安東之壩疏停道滯

禹績用宣越鬢鑿之繼

志復身畚芟以爲人先或醜之渠或滌之川迨茲

五巡而

授策彌決於萬全叟亦能第嘉頌而誦翁河之篇乎

壤叟曰天人之交元契斯應幽贊神明昌符協

聖屬儀考之澹菑佻期日而未竟用夙夜紆軫於

皇心謂皓皓盱盱之爲吾民病昨

鳳艦之造梁告吉禱而展敬迴

淵衷以默祈禮

祠庭而弭榜河精禋禋盼蠻如贈升煙財瞥乎一昔已

周流常羊而允答夫

神聽欽陽感

天之洵不旋日葳隄繇而誌慶若乃竹箭春流黃淮滙
併填淤反壤偪則劇競自廝新河於陶莊而濁無回漾
清無帶輪乃廣滉而各若其性茲者

法駕臨視

鑒抽薪上策更重巽以申

命焉岸拓容湍波寬失勁重臣稟

算導緯析經亦粵雲梯下趨彭城上亘驗水維於蒼檢

勤

宵衣而權訂豈伊後世溝洫河渠之志所得絜其

訐謨固已揆地通原邁羲軒而遐負

謠童乃作而謝負劒而請益曰蒙也沐浴

醲化出作人息以飲以食不知不識第延跂夫

穆穆之光而莫克形容乎

盛德幸叟昭晰震煒俾瞑躡者得以窺職植者得以測

歌詠

帝力長餐挹而無極

於是前喁後于結纓聯紳抃呀怡懌偕拜手而進陳曰
蓋聞乾坤之策二五式均肇五遞積奇偶相因自萬有
一千五百二十而推演於無量戴天行者識圓轉其如
輪恭惟上章以五
紀歲正泰元增策

表晉七旬而習五繇以告祥者又適屆十有五載用懋
舉夫

五巡五位相得而各有合忻若緯環嶽拱介
純嘏而啟洪鈞由是相乘相衍將萃元會運世而駢禔

納祉於
聖人游

壽寓者容隸不能究其算述

巡典者媯妣不能邁其倫至如臣等昭景飲醴含冲佩
淳際游華而錫羨樂登臺之恒春惟曰自今至於萬億
年勿替引之常祝

慶祺而翹

勤蹕此所以尤僊戀於

屬車之清塵也若夫觀河拜雒察扈合符荒誕瑰異之

說固

聖哲所弗道又烏足以擬議而竝論

御試文

誠無爲論

嘗觀萬理之具於我心者莫不有其渾然太極之真與爲細縕而摩盪而要其所爲渾然者一念之未發一私之不縈天下萬事萬物之理毅然具足於其中而天下萬事萬物之所以然仍寂然不動於其內何也曰天體無爲而原之出於天者亦莫不有其人生而靜之初焉

此無爲之旨周子所以言誠而卽太極之義所由發明也今夫大哉乾元萬物資始誠之源也乾道變化各正性命誠斯立焉誠非確有主名之可按哉然而誠固無可名也可名則有爲有爲則非復太極之真矣五性相感而未感則無爲忿懣恐懼好樂憂患之未萌其蘊於一誠者絕無端倪之可尋百行有原而其原則無爲惻隱羞惡辭讓是非之未著其統於一誠者更無情狀之可覩大哉誠乎自其在天者而言則隤然確然易簡之原宰乎羣動之先而太虛無朕所謂上天之載無聲無

臭也自其在人者而言則何思何慮寧謐之衷立乎云
爲之始而得主有常所謂成性存存道義之門也自其
統乎畢生而言則赤子之心卽其誠雖無端啼笑未始
不類乎有爲而由少壯以觀則知識未開者一無爲之
體也自其由乎一日而言則平旦之氣卽其誠雖好惡
相近未嘗不驗之於有爲而就旦晝以遯則枯亡未觀
者一無爲之象也大哉誠乎根乎物與无妄之原藏於
宥密不見之地靜而無靜不淪於寂滅動而無動時見
其淵涵一物未交而聖狂莫判萬籟俱息而舜跖無分

如鑑之空如水之止鬼神莫窺其朕兆覩聞悉泯其形
聲以至無而涵至有以至虛而含至實非以無爲而宰
乎百爲者乎若夫由此而達之於爲則爲幾矣幾則易
漓乎誠吉凶悔吝生乎動其是之謂乎

擬爵李躬桓榮詔

朕獲承至尊休德傳之無窮思稽古典以教孝弟仰惟
光武皇帝受命中興撥亂反正耆定武功遂建三朝之
禮恢宏大道被之八極而臨饗未行至德莫究永言遺
緒夙夜常在朕心迺者暮春吉辰初行大射令月元日

復踐辟雍尊事三老兄事五更公卿撰杖朕親祖割樂
既備奏進而乞言百僚具瞻兆庶忻暢斯皆聖祖功德
之所致也顧惟涼薄仰承休業獲受斯慶踧踖惟慚三
老李躬德淳學茂五更桓榮傅朕東宮朕既不德不能
厚報重閔勞以官職之事其各以二千石祿養終厥身
竝賜榮爵關內侯食邑五千戶天下三老人賜酒一石
肉四十斤有司其申勅四方率由孝治養耆艾奉高年
俾化成於鄉以永光我漢德豈不休焉

擬循古節儉奏

臣聞先王之制自天子公侯卿大夫士至於皁隸抱關
擊柝者其爵祿奉養宮室車服之制各有差別小不得
僭大賤不得踰貴非特其制節謹度然也蓋所以辨上
下而定民志防其奢欲之萌而杜其亡極之漸是故堯
舜之世土階不翦茅茨不飾宮女不過九人秣馬不過
八匹所以蕃阜庶物節宣財賄穡足功用如此之備也
故天下家給人足而頌聲作易曰后以裁成輔相天地
之宜以左右民備物致用立成器以爲天下利莫大乎
聖人此之謂也至高祖定都咸陽反秦之弊孝文皇帝

循古節儉身衣弋綈慎夫人衣不曳地嘗欲營露臺召匠計之直百金上曰百金中人十家之產也遂止苑囿服御無所增益有不便輒弛以利民是以海內殷富興於禮義此躬行儉德之大效也孝武之世大事兵革行齋居送中外騷擾而又廣治宮室起上林苑屬之南山又多取好女至數千人以填後宮及孝昭幼沖霍光秉政不能以禮輔導山陵多瘞藏物又出後宮女置於園寢沿及孝宣相踵不絕羣臣莫知舉正甚可痛也是故奢侈成俗轉轉相効大夫僭諸侯諸侯僭天子嫁娶過

度祭葬越禮衣服劔履亂於主上然不自知其僭也習爲固常媮視一切蕩然無復禮義之心陛下又不爲矯正弊將安所底乎今大臣徒循故事無可言議論語曰當仁不讓臣愚以爲陛下宜斷自聖心參稽往制以復古化不當因循苟且有厚自奉養之心今齊三服官作工數千蜀廣漢主金銀器官費鉅萬夫竭民之財以奉主上所求無窮而其力有盡今民苦饑饉而廐馬食粟且萬匹非所以示爲民父母也臣禹不勝拳拳唯陛下深察古道從其儉者乘輿服御三分去二後宮擇留二

十人諸陵園女悉遣宜春下苑西南至山西至鄠悉復以賦貧民庶大自減損有以安元元之命稱上天之心夫聖人憂民非自娛樂上不甚損而下受其益陛下何憚而不爲耶伏願遠思堯舜之德近察文景之治鑒海內耗弊之由絕法度無限之本移風易俗曠然一變其始太平之基可立致也

耗羨有無利弊策

臣對臣聞古之言國計者莫備於周官一書冢宰之職九賦以斂財賄九貢以致邦用歲會月要具有定式皆

所謂惟正之供者然考太府所掌式貢之餘財以供玩好之用而金玉齒革又屬之於內府則常賦之外自有贏餘者以儲用可知也後代貢賦所出幣易而錢錢易而鈔鈔易而銀完納有多寡之殊傾鎔有銷耗之漸於是而散而聚者尤不能不藉贏餘之數以贍費而便民而漢唐以還其制不立故靡得詳焉我

國家本計加勤民寧益裕輕徭薄賦休養百有餘年而耗羨歸公一項或有以於古未合爲疑者不知耗羨之名雖不見於列史而其意實本於周官且在今日除弊

利民更有不得不出於此者臣竊綜其利害而計之方耗羨之未歸公也常賦爲府庫之上供耗羨爲州縣所自取儲之府庫者有冊籍之鈎較而杪忽不容以橫增取之州縣者任谿壑之貪婪而千萬何妨於恣意其所以蠹國而病民者豈有窮極哉然其仰食於耗羨者正不獨州縣之予取予求也上官勒索期會日至於府矣京僚借貸竿牘不絕於門矣且也親戚之交遊僮奴之衣食又無慮千百指之垂橐而待矣於是罄其所有不足以供而勸輸之令科派之日遍擾於民間拖欠之久

虧空之多遂及於帑項民困之所以難蘇而官箴之所
以日闕者職是故也自雍正年間定歸公之制始舉積
弊而一空之官吏絕依附之徒而苞苴之風息公費有
支銷之款而箕斂之累除而又卽其中設養廉銀兩以
優贍臣僚俾官與民兩受其便誠萬世之法程也顧行
之旣久而公私積弊未能盡去猶有足以上厯

宸衷者臣愚以爲耗羨之制斟酌盡善固可爲久遠之
規今日所慮亦惟在司其事者之奉行不善而已蓋耗
羨有恒數而不肖者輒思加重平餘養廉有常支而濫

費者不免動及正帑將恐耗羨之外更生耗羨而利孔日開民乏日甚有大足爲成制之害者此前憲昭垂之下不可無隨時補救之宜也我

皇上惠澤覃敷仁風廣扇蠲租減稅疊降

恩綸薄海黎元無不飲和食德而又諄諄

詔諭大小臣工以潔已愛民爲要務凡有地方錢糧之責者果能凜遵

聖訓奉公守法砥礪廉隅而督撫監司又爲之以時督率俾出納有準務矢清白之操徵收有方不爲苛急之

政用度之浮靡必謹胥吏之稽察加嚴庶乎有利無弊而良法與美意竝存國計與民生永賴矣臣謹對

寶奎堂集卷二

孫男成沅謹重刊

寶奎堂集卷三

上海陸錫熊耳山撰

表

爲王大臣賀

平定緬甸表

欽惟我

皇上聖武布昭仁恩普被懔威稜於有截師中揚鈇鉞
之聲溥聲教於無垠化外格車書之會協一方一圓以
致用神機不設成心苞九天九地以稱奇遠馭長操勝

算奄羌髯而受索銅標雪棧之塗跨濛朏以開疆玉貢
金庭之域凡人事天時之有合先幾炳燭於
九重故義征仁育之咸宜

獨斷折衝於萬里率俾暨光天之下孰敢外於鈞陶來
威若時雨之行自不勞於血刃欣際六師霆震共看蠻
服之救寧仰欽八表風從彌慶

帝圖之廣大蠢茲緬甸本屬么磨窮邊稱白象之酋竝
海畫朱波之壤巢梟覆卵莽瑞體既炊火無遺乳虎游
魂甕藉牙復羽毛漸長屬疆臣之稽討始示包含乃逆

孽之亂常旋滋鈔竊責白罽金旄之稅種人則洊被鯨
吞匿叢篁茂箐之區醜類則潛驅烏合向緣邊而盜食
各土司偵候常驚敢附塞而藏逋諸版納耕糴盡擾後
虹霓於列部望切來蘇翦蜂蠆於窮荒誅先後至迺
咨偏旅爰示薄懲萬竈因糧指蟻封而采入千旌奪壘
掃象陣以橫馳詎挺原伏莽之能爲顧薙草獮禽之未
忍

謂不足臣而不足守原無煩斧質之汗庸示以德而示
以威俾共喻丹青之信當三旬之逆命舞干猶洽於好

生更一載之休兵食椹期思夫憬德豈意穴鮒假息未
悔觸藩檻獸呼羣尚懷拒轍旣益稔怙終之惡實難寬
阻教之刑於是赫

天怒以宣威秉

神機而授算因相臣之籲請

命佩印則旄節飛霜選禁旅之騰驤肅禡牙則弓刀曜
日用簡孚於在位兵出有名維震驚乎朕師罰行罔赦
蓋

聖人之心非得已

睿懷咸喻乎羣工而司馬之法有必伸

義問早宣於絕徼故乃關開鐵壁分兩道而搗厥中心
路繞金江按五城而斷其右臂野牛壩晨漂木柀雲排
下瀨之船戛鳩水曉亘梁虹雨洗凌波之甲南掌則騰
箋貢款脩矛戟以同仇猛拱則獻籍輪忱屬橐鞬而請
吏自會師於蠻暮旋奏捷於新街地迸千雷奪幟而頻
舉畫纛星飛一箭伏發而早殪紅衣老官屯乍合長圍
阿瓦城已披狡窟方見雲梯百道尅日而犁掃堪期
特念霧嶺千重計候而鬱蒸是廛

中旨決班師之策方矜暴露於熊羆急郵傳奉朔之章
遂覩響風於豺獍頭目則投戈繫組乞命須臾緬酋則
襲錦封函革心祈請率南人以受約讐

天威而若藿傾陽拱北極以朝宗捧

德命而如綸布澤賓幪蠻貊駢闐羅迓道之漿漆股文
身鞠膾敏當關之鑰列睚眦而舞仗待重增王會之篇
一尉侯以頒符看更續形方之紀維事機之適會陰陽
悉契乎

天行故震疊之遙傳進止咸承夫

廟算雖

一人裕謙沖之度

宵衣猶歎成功而萬方知弔伐之由折筮原非究武逆
者征而順者撫仰

至人張弛之宜叛則攘而來則安實中夏羈縻之道從
此苴蘭入版百夷之包匭偕來還欣滇洱流膏六詔之
藩籬永奠底羣方而慕化洵闔寓之流歡臣等忝列具
僚恭逢

盛事奉

德音而動色如親挾纊於軍中緘誓表而馳誠徒愧請
纓於闔外叶止戈之爲武頌

至德而運量難名覩益地之成圖仰

神規而贊揚曷罄譜歌詞於槃木恰同臚介

壽之觴煥瑞曜於離方喜益茂

延釐之錄

爲王大臣賀

平定金川表

欽惟我

皇上德懋敷文功崇綏遠車書萬國瑤圖越參井之躔
干羽兩階玉壘靖攬槍之氣法采薇以命帥偕迎時雨
之師圖滋蔓以寧邊普洽光天之化維金川之小醜介
蜀塞之一隅徼接旄牛輒夜郎之自大蠻聯板楯每旬
町之相攻懷奸久恃其包藏授律曾經夫撻伐射九頭
而掃跡

神威早凜軒弧祝一面而全生

大德幸寬湯網方謂雷霆收怒期豺性之終馴豈知風
雨興妖尙鴟音之難革凶殘相繼索諾木則羆又生罷

間謀潛通僧格桑則唇還倚齒竊稱戈於鄰部妄逞磨
牙屬出柙於疆臣猶稽落膽我

皇上念穴中之鬪鼠汗斧無煩憐釜底之游魚炎岡未
忍倘三章之奉約珠崖原許羈縻迫九伐之興師丹浦
初非樂戰迺跳梁之自阻更伏莽之羣興聯九姓以分
疆咸遭蹂躪控三城而置戍敢肆憑陵拒比陰螭旣
生成之自絕噬同瘕狗洵苞藁之當鉏蠢茲憤結神人
天討宜申於司馬

鑿彼窻求邊徼妖氛冀靖夫封狼始弗獲已而用兵謂
不恭命者無赦於是銀麟授印高懸大將之旗玉虎分
符廣練飲飛之士修戈矛而偕作禁旅雲騰咨彭濮以
咸徠連營雷動桃關啟路威通井絡之墟雪嶺揚兵氣
奪綢金之堡指翔禽之晝落但怯虛弦逐兔兔之宵奔
惟存空窟乃平摧夫堅壁全收蓋拉之疆復

申命夫中權進壓促浸之境千山鼓角天上爭鳴兩路
貔貅雲端竝下峯迴東馬層礪則捲籜齊飛逕闢緣猱
峻棧則凌緝直度勒烏圍高墉不守匈奴之右臂先除
噶喇依孤壘徒撐長狄之春喉難遁摩霄拔幟盡散狐

羣匝地張羅立窮鼯技星臨廣幕徑探穴虎之城月暈
重圍不斷長蛇之陣賊徒攜貳方剗刃以來降番衆謹
呼競提算而受撫信覆巢之莫保親戚皆離遂繫組之
成擒罪人斯得是皆我

皇上天威遠播神武遐宣懸金鏡於

先幾無微不照握瑤鈴於祕策惟斷乃成

御札三霄赤羽問投籤之候軍書萬里

丹毫成聚米之圖蓋奇正兼資

授算不踰乎寸晷故機宜悉稟集勲適蕝夫五年黃鉞

聲靈盡掃沈黎之霧紅旗騰踏遙穿叩穀之雲會茲辰
凱唱金鏡

春闕之共球正集看他日歌傳槃木雪山之耕鑿常恬
喜溢班聯歡臚寰宇臣等才慚磨盾願切鐫銘迓百福
於

王正欣聞吉語頌六師於周什倍仰

神謨際靈臺偃伯之庥包戈共慶續麟閣銘功之盛宣

石難名

爲總裁進

平定準噶爾方略表

欽惟我

皇上神謨廣運義問遐宣德耀軒弧地絡恢紫濛之野
化覃禹服天山鞏白阜之圖拓二萬里甌脫而遙共球
翕集越廿八宿經躔以外疆索閱開周原排築舍之謀
握珠鈴於獨斷大漠奏犁庭之績懸金鏡於先幾師期
甫再閏而不踰

廟算爲百王所未有碣樹龍堆絕徼流沙詎盡提封觚
操虎觀新編聚米宜昭方略曰前曰正曰續彙

三朝之訓典而兼賅系日系月系年書兩部之蕩平而
悉備原夫傳標西域錄著班書鎮啟北庭事詳唐籍繞
陽關而保塞外孫之國空傳度陰磧以懸兵都護之官
旋罷難堅約束焉耆王則侍子終歸略受羈糜吐谷渾
則降番欲散矧復湟流地限徒矜貢馬之連羣要知蒞
醬名高究屬乘槎之鑿空創非常而立極奇功實待於
聖人擴無外以恢紘盛事獨超於亘古溯自阿魯台之
部別爲準噶爾之名顧實汗旣老上初強噶爾丹遂夜
郎自大四部本伊唇齒雄心已侈鯨吞七旗係我藩籬

寶奎堂集
狡計將羅蠶食洪惟我

聖祖仁皇帝親征三駕凶渠仰藥以歸骸爰逮我

世宗憲皇帝大武一匡逆孽輸琛而表界惡未盈於五
稔姑稍寬畫斧之期亂彌扇於九黎將自遘焚巢之禍
蓋威畏德懷之竝用實天時人事之猶須當

聖主之初元正

神機之默運乃閔蟻頻經掃穴終焉推刃相尋亡猿亦
効款關正爾操刀宜割迓壺箠以載道競傾馬乳之漿
蹴廬帳於窮荒竟折狼頭之燾厄魯特燎原孰避及時

春雨其蘇綽羅斯因壘皆降所過秋毫無犯右師麾螯
先濟俄傳頡利之宵奔別部捧檄偕來已見兜題之面
縛將欲性馴虎落分封存衛拉之規何期唇沸鴉音交
扇起伊犁之黨比烝徒勢集怒螳猶覬當車而小醜途
窮兔豈容擇窟邏騎徠大宛汗血共期誅毋寡之頭
窮鱗賸羅刹游魂早見瘞蚩尤之髀舉虺潛之逆種莫
請灰釘暨烏合之凶徒均膏齊斧籌萬全而安衽席因
一舉而靖欃槍至分部於花門原連疆於葱嶺責延留
之納稅誰憐力盡鞭笞等阿惡之拘酋久已命懸湯火

詎入檻之纍囚方釋鷹竟離鞬迨乘輅之節使被遮豺
還當道實難期於人理寧得追乎天誅是用

申命元戎冀行顯罰下諸城而斷臂白山之士氣胥騰
踰重險以攻心黑水之軍聲協應乍覩朽紅困滿三單
因雪窖之糧旋聞鼓角地鳴萬里躡注池之騎維

睿畫早周乎前事六師疑天上而來况聲威尤懾夫後
援二豎尙井中而坐伊西洱風雲合陣于鬣之棄甲何
多拔達山草木知兵巨骨之專車遂致於是收其種落
初興司馬之屯定厥租庸更置宜禾之尉從茲出玉門

而風和吹遂開繡壤而雨潤翻犁測月蝕以分疆正緯
度東西之次越繩崖而表景總金山南北之圖查拉則
花蕊翻新不數車師白氍騰格則暮文別鑄全銷安息
金錢邊營苜蓿千羣不費市臺之採購遠堠黍稷萬畝
無煩農部之輓輸矧月盈璇壁之河歲致崑波撈玉露
浥葡萄之圃人霑閭苑分漿大都督門戶持麾扼蛇陣
適中之勢副校尉輔車列鑰規犬牙相制之形秋嚴乘
障之烽瓜期及而一軍番戍春荷醴渠之鋪柳中屯而
六郡催耕羣欣通道痕都五印土同遊化宇自悔陸梁

烏什一丸泥立墮孤城彎庭氏之神弓孽芽盡折按形
方之要籍灰燼全消蓋惟屢變而愈康

天授若符乎左券以故一勞而永逸

神謀適契乎中權者也今試溯牙璋之初發洎玉斧之
長驅實承鴻貺而方臻用展龍韜而屢捷臚奉常以紀
績際會昌辰譜桐鼓以宣音鋪陳偉伐旣施仁而布澤
還飾喜以崇儀

郊勞臺邊饒鐫和甘涼之曲策勳閣下丹青傳褒鄂之
姿因覘

聖武之布昭進頌

奎章之炳煥提要揭雲霄之指鐸振聳鄉盤空鐫金石
之文星輝昧谷火敦腦粘天浪靜慶

王師洗甲而還狼居胥冠日峯高瞻

天筆勒銘其上維居中以制外包九天十地而運幹璇
樞用原始以要終括二典三謨而文刊玉律莫不六條
頡格長貽奠枕之安九域歸懷益見鞏甌之固準天保
采薇以出治頌聲之作昭然邁握幾鉤要而成經軍志
之言粹矣臣等忝効編摩預聞

密勿驚銅籤而候燎每聽五夜之

傳宣紬石室而濡毫寧藉一辭之潤色匝月再呈夫乙覽爲書百七十卷而奇程功託始於亥春閱時十有五
年之久欽大業之守而彌創集靈臺偃伯之庥仰淵衷之謙以持盈徵冊府傳心之要

爲總裁進

御批通鑑輯覽表

欽惟我

皇上法古綏猷右文成化稽帝堯而稽帝舜考禮樂以

等百世之王監有夏而監有殷秉權衡以定一中之統刊歷代廿二家之史文訂差訛紀勝國三百載之書編沿正續廣修明於舊典取鑑無遺闡義例於微言折衷有待惟

作者之謂聖體則史而義則經洵

煥乎其有文指以千而言以萬成編旣定

至教斯垂原夫在昔有邦若時稽古因文見義用布訓於丹青比事屬辭咸取裁於筆削蓋史使其記必明取舍之宜而鑑監於前實具是非之迹至編年以定體尤

提要而徵文涑水之表歲系時哀輯實原於漢紀紫陽
之列綱分目指歸悉本於魯書洎遞嬗夫元明亦間沿
爲著述然而年芟益部不同習氏之存劉系黜房陵莫
問昭公之在晉合書地書人以表例柄鑿恒多繫歲陽
歲陰以表名盾矛不免雖糾唐有作文人之習相沿而
譏鄙無庸史法之傳漸失乃在前明中葉復有纂要一
書略具規模倍多踏駁魯魚錯見沿故牘之乖譌臧否
失宜任詹言之蕪漏當發函於

幾暇欲訂毫釐因付館以編摩載陳圭臬纂排數載蒼
萃羣書授青簡而
肇錫嘉名

御丹毫而時抒精義溯自分編以論次逮茲削藁而觀
成凡條目之攸紛幸

睿裁之悉稟

闡特標之論覺管窺蠡測而無由

垂刪定之文實壤薄流涓之莫助承素王而續彝典說
明則道自可行仰

聖祖而紹前聞揆一則心無不合昭其經法大旨備而

悉奉指南示以變通舊例繁而不皆從朔大用策而小用牘若網在綱國爲緯而年爲經咸指諸掌審是非而繩懸悉準具首尾而囊括無遺紀載之例綦嚴宜事增而文省見聞之辭各異故遠略而近詳或分注以備言特書與附書竝列或後經以終義事本與事末兼該披月竈之輿圖悉河判重源之實考星經之次舍知躔同五緯之誣國語則遙證金源按出之傳譌始剖世牒則遠徵蒙古却特之受姓咸稽以至正字審音三蒼竝協旁及釋名辨物五雅兼資凡質實而辨疑盡部居而州

次譬校讐於掃葉作述之義昭如擘體要於挈裘興替之端備矣且夫正統偏安之辨尤屬人心天命所關卽良史未協於大公欽

宸斷獨衷於至是蓋自緹油失職恒緣諱飾爲文迨至光岳分區浸以詆謫成習互稱夫烏索徒相嘲出聘之車號已貶於孫臣尙欲侈橫磨之劍總偏私之曲徇致名義之都乖況如丙丁讖成宋祚隨江湖竝歇庚申史就元基與塞草同荒乃或續景炎於南渡之餘更且擯至正於北遷之始皆妄加其子奪遂盡悖乎公平惟

至聖之制義因心故定案必循名責實削紀年於閏位
凜乎大命之難謀改書寇於舊條截然內詞之莫假實
從古未發之義於此心適得所同屬勝朝改玉之時當
聖代膺圖之會欣際

六龍乘御大一統已悉受周疆

特念五馬倉皇小朝廷尙僅留夏肆殉黃巾於冀北旣
大書春月之三擅白版於江東遂并紀福王之一運分
甲乙存殘局而國號斯加事附閩滇溯遺封而藩稱非
僞是皆擴

天地爲公之量覆載同符因之冠

星雲有倬之章典謨竝燦春秋之旨
在居正奉正義以無私帝王之事集大成
勒成書於有永允矣無偏而無黨粲然是訓
而是行至

特筆之所垂統全書而咸貫劔南之册未至
肅王不改儲稱上都之號猶存懷邸難逃纂字
循莽大夫之例望石城而冷笑褚公冠周平
章之名對高廟而多慚狄相莫不約羣紛以
炳義本

彝訓以敷言立綱常名教之大防極微顯婉彰而一致

信讀書之貴得間不啻引錐而畫沙審觀人之必於微
乃知鑄國以象物蓋揚王鈇以治萬世非

天子莫操其權而會民極以執兩端獨

聖人能見其大昔者蘭陵通史繁華徒侈千篇貞觀晉
書論斷祇存四贊咨忠臣而錄袁粲寧本親裁侈盛事
而補陳橋何關正體從未有定書法則

軒鏡心懸著史評則

堯文手勒善者勸而惡者懼知袞鉞之非空言參於天
而驗於人在方策以明大道書成一百二十卷盡善盡

美而菘以加事紀四千五百年舉要舉凡而得其當臣
等學慚閱覽才謝淹通識故籍而有愧五難論先民而
粗聞十例時政記言起居記事願依左右史之班伯恭
知古君舉知今難參大小賢之例屬操觚於虎觀濫廁
分排承執簡於麟編幸邀

鑒定惟子夏得其書矣詎能贊夫一辭若臯陶見而知
之實叨榮於千載從此名山藏副定百家作史之模更
欣

祕殿刊成闡奕禩傳心之要

劄子

爲在京漢官奏謝開科蠲漕劄子

欽惟我

皇上治握瑤樞化光玉燭躔開璧府布文露以占祥藉
劭珠倉驗歲星以錫福天衢利見道亨而論秀偕升地
寶咸登頌作而綏豐屢告四度廣寒增籍珊瀛之解額
頻加三回發運蠲符繡壤之田租盡復建新鬻於磧外
絃歌遍月窟而西食舊德於寰中耕鑿滿春臺之上固
已菁莪樂育二庠之賓賦呈材廡蒙庥九鵠之農辰

協正茲以泰元推筴將增寶表於

堯年因之尺一頒

綸預却瑤觥於幽雅在臣庶情臚獻

壽尙慚三祝之輪忱乃

聖人欲軫從民

特慰萬方之待澤念儲才於學校彙征吉而闡用四門

思藏富於閭閻慶賜行而足先百姓捧雲中之

鳳詔歡動青衿拜天上之

鸞書和生綠峴薪樵叶咏添栽桃李於春官粟秭無徵

寶奎堂集
普免稻梁於秋賦桂苑聯登杏苑十七省真喜洽周天
豫州遞及荊州廿四郡仍膏流間歲合兩闈以溥
惠冠子卯酉而瑞啟先庚輪七載以施

恩屆甲乙丙而祥鍾當午選賢書則三場迭試正副榜
之名姓都題準計簿則九等均籌本折色之顆銖盡豁
湖卅六科搜羅允備更今番路廣彈冠數十五年

曠蕩重申猶前度糧餘棲畝霓裳疊奏競接武於青雲
戶帖停催看騰歡於赤縣從此奎芒射彩吉徵瞻聚緯
之符還如太乙行宮福曜遍臨方之慶紫垣煜爚羣欣

懋祉之駢臻黃紙傳宣共荷

湛恩之彌渥臣等幸依魏闕仰誦

宸謨榮已溢於彰纓覩盛事而快先韋布愧方深於竊
粟奉

溫言而感倍鄉閭近

光首切夫鳧趨戴

德同陪夫鰲抃拔十尙期得五願諸生勉副

旁求耕九定獲餘三知太史常書大有塗謠巷抃冀稍
抒銜結之私山壽川增惟益晉

升恒之頌

爲熱河諸生謝設學建廟釋奠落成劄子

欽惟我

皇上統備君師化覃中外率俾暨光天之下千百國文
德同敷執中肇建極之原十六字心傳畢貫涉星波以
負笈重瀛之子弟偕來徧月窟以橫經絕域之絃歌相
應惟興州之奧壤當朔野之名區溯畫界於五京尙闕
版章之籍逮棄疆於三衛幾成甌脫之鄉自全輿歸形
訓之官始長塹罷春秋之戍駐

軒皇之華蓋豫遊常奉鳴鑾築

堯帝之茨宮會極曾臚合瑞乘六龍以時莅

天行垂法

祖之猷屯七校以從蒐

聖武震柔邊之策塞田留熟慶數千里匝隴桑麻

仙館那居看十萬戶環闐煙火班初升於赤縣彌覘地
產殷繁志已藏於黃圖尙軫人文樸略

念序庠其有制聿遵太學之成模

謂富庶以何加宜廸

聖人之至教因誕敷夫

恩綽俾特建夫新翼列舒雁之青衿員增弟子擁銜鱣
之絳帳職領師儒正誼分齋肄籥課四時之業明倫表
額限經循二試之規度爽塏以初營泮水則半規浮碧
峙桷楹以竝作宮牆則萬仞飛翬爰嚴栗主之隆儀仍
準戟門之令式禮崇

文廟揭日月以升東號冠熱河紀山川而從朔侑馨香
於兩序配祠之定位無訛宣和雅於三終正律之元音
悉備秀鍾武列知衆派之同歸瑞拱興安仰高山之在

望當采芹而思樂來巡纔迓

鸞旂乃釋菜而觀成展謁還紆

玉輅盈階吉佾重比園橋列几嘉邊輝分闕里辨操協
奇褒之節屈萬乘以尊師陪禮偕奔走之司

詔諸生以觀禮重勒劈窠鉅榜墨海騰虬

特摛紀事鴻篇文園翔鳳神明無往而不在想壁中金
奏遙傳禮樂待時而後興正天上奎文永煥某等欣沾
時雨幸服儒風飲和貽作息之恬論秀沐栽培之厚聽
講堂之鼓篋乍荷甄陶覩禮殿之懸圖惟深踴躍近

寶奎堂集
光華於塞上恍相攜槐市生徒和絃誦於關中欲常傍
杏壇雨露欽此日詩書立訓適追牖俗之
神謨願他年棫樸成材長頌作人之
聖壽

爲王大臣謝

賜清文鑑劄子

欽惟我

皇上文思廣運聖學超微八風宣而韻叶和笛聲皆爲
律六文成而祥開彩笈字本於形史釐前代舛訛彙三

朝以訂義志剏同文標準合西域以臚音粵徵鴻製於
國書久奉成編於

文鑑在昔

神明立極肇開義畫於先天及茲

述作宣猷重煥堯文於奕世闡元音以述要欽

聖以繼

聖之隆模參新例而發凡仰精益求精之

睿志自

綸言之渙布經館局以分排

國語首標建臬表創垂之制漢書旁附貫珠諧通變之
歸權輿於一十二字之中悉唇調而齒協推衍於三十
六部之內亦眵次以州分舉類稱名卅二卷舊聞大備
象形會意五千言新語增翻蓋音本自然清濁分而音
皆從字故義非強合箋疏當而義不消音凡夫精意所
昭垂悉本

聖裁之鑒定全函鐫就集形聲至理以咸該令甲
頒來達邦國書名而皆準茲復仰承
嘉惠均荷

榮施捧白

丹墀敬誦

聖人之制作肇來緇帙欣逢

天子之考文臣等學昧審音才慚識字仿推詳於轉注
信從來穿鑿皆非循繙譯於偏旁幸此日考衷得是揚
王庭以宣化願偕九譯而同遵教國子以程書常與六
經而竝重

爲王大臣謝

賜御製詩三集劄子

欽惟我

皇上觀文成化出言爲經垂玉策於詩壇叶九奏莖韶
之韻冠瑤章於集庫陳八風紜縵之音千篇則點筆如
飛經緯新而熟彌生巧十體則分箋竝下包含廣而大
可通神契歲序之周星初二集巳辰環鳳律運天行之
駢曜萬千首更珙積驪淵溯細簡於先庚雲鏡奏雅洎
增函於開甲芝莢敷珍粵矢詩之旣多洵體物而咸備
彤闈愛晷述盛典於萱枝

翠輦行春陋新歌於竹箭驗雨暘之時若在宥同歸擷
子史之微言羣疑竝析法六經以見道精焉卽兵農禮
樂之書彙萬有以取材散之兼草木蟲魚之疏何止比
周公制作僅諸家盡入範圍卽使付游夏叅詳實一字
不能增損佇窺全於延閣赤文願覩光華迨錄副於
禁林翠版載咨剗劂三編排就會甲乙丙而包括三才
百卷刊成起漢唐宋而陶鎔百氏欣叨承夫

恩賜獲仰誦夫敷言錦帙攜來紫極之雲霞交燦牙籤
頒到黃封之翰墨俱香正襟對而肅若橫經盥手題而
恭逾執玉惟冀藏諸三篋永貽珍什襲之傳還看載以

寶奎堂集卷三
五車佇閱紀便蕃之錫臣等學慚篆刻才謝賡颺和雅
頌而莫效來歌感宮商而自同率舞度奉則榮光照室
知天下之

大文披尋而妙緒生心信

聖人之至教惟深欽佩曷罄名言

寶奎堂集卷三

孫男成沅謹重刊

